

25 MAY 1998

Suriname-sambutan

TUANKU JA'AFAR SAMBUT PRESIDEN SURINAME

KUALA LUMPUR, 25 Mei (Bernama) -- Presiden Suriname, Jules Wijdenbosch yang memulakan lawatan negara selama dua hari ke negara ini hari ini diberi sambutan rasmi di Medan Parlimen di sini pagi ini.

Beliau disambut oleh Yang di-Pertuan Agong Tuanku Ja'afar sebelum diperkenalkan kepada menteri-menteri Kabinet, timbalan menteri dan perwakilan asing di sini.

Wijdenbosch memeriksa perbarisan kehormatan oleh 107 pegawai dan anggota Batalion Pertama Rejimen Askar Melayu Diraja (RAMD) di bawah pemerintahan Mejar Abdul Basit Abdul Rahman.

Wijdenbosch yang diiringi oleh isterinya Patricia d'Leon serta anggota delegasi termasuk beberapa orang menteri tiba malam tadi.

Wijdenbosch yang melakukan lawatan ini atas undangan Tuanku Ja'afar dijadual mengadakan pertemuan dengan Perdana Menteri Datuk Seri Dr Mahathir Mohamad dan menyaksikan upacara menandatangani beberapa perjanjian dua hala di Jabatan Perdana Menteri (JPM) lewat hari ini.

Malam ini, Tuanku Ja'afar akan meraikan pemimpin Suriname itu pada majlis santapan negara di Istana Negara.

Wijdenbosch akan menghadiri majlis taklimat di Unit Perancang Ekonomi, JPM dan melawat Institut Penyelidikan Kelapa Sawit Malaysia (Porim) di Bangi, esok.

Suriname terletak di bahagian utara Amerika Selatan menghadap Lautan Atlantik Utara dan bersempadan dengan Brazil, French Guiana dan Guyana.

Ibu negerinya, Paramaribo.

-- BERNAMA

MAM oba